

# Te mahere ā-rohe o Albert-Eden 2020

He aronga poto i tā mātou mahere



## Mihi

Titiro ki te Pane o Horoiwi,  
ka whakapukepuke, ka whakatiketike ki waho rā.  
He kawau, he kawau, he kawau!  
He kawau tikitiki ka eke ki te tāhuna tōrea.  
He kawau tikitiki ka eke ki te tāhuna ki  
Te Waitematā.  
Ko koutou ēna e ngā mataawaka  
i rite ai te kōrero,  
Ngā waka o Taikehu me he kāhui kātaha  
kapi-tai, ka eke!  
Kua eke, hui e, tāiki e!  
Te noho nei au i te kūrae i Takaparawhā,  
ka titiro whakawaho ki a koe Aotea  
e tū hihiwa mai rā i te pae o te moana o Hauraki.  
Ka hoki whakaroto ake aku mihi ki a Waiheke,  
ki a Rangitoto te pueanga mutunga  
a te moana.  
Kia ū mai anō au ki te one i Ōkahu,  
kia takahia e au te rārangi maunga i uta.  
Ki te tonga ko Maungarei,  
kei raro ko te Kōpua Kai a Hiku.  
Ka rere mā roto ki Puketāpapa,  
kia pikī au ki Maungakiekie,  
Tūpō-o-te-tini.  
Ka whakamau taku haere  
mā te Ahikāroa a Rakataura kia taka atu au  
ki te Ara Whakapekapēka o Ruarangi.  
I konā ka aro tika atu au ki a koe e Maungawhau  
te tū whakahira tonu mai nā i te pū o te wheke,  
kua werohia nei e te Tūkoi o te Rangi,  
kia pokanoa au ki te pepeha  
a Tītahi,  
“Koia te pou whakairo ka tū ki Waitematā  
i ōku wairangitanga”,  
kia whakaotihia noa ai ki te kōrero rā,  
“Te pai me te whai rawa o Tāmaki.”

Kei tēnei puka te whakarāpopotohangā o te Mahere Poari ā-Rohe. Toro atu ki te paetukutuku o Te Kaunihera o Tāmaki Makaurau,  
[www.aucklandcouncil.govt.nz](http://www.aucklandcouncil.govt.nz) mō te roanga ake o te mahere.

## He kōrero nō te Heamana

Tēnā koutou katoa. Hei waha kōrero mō te Poari ā-Rohe o Albert-Eden - taku harikoa hoki ki te whakatakoto i te Mahere Poari ā-Rohe o Albert-Eden 2020 ki mua i te aroaro.

Ka whakatakoto te mahere i te ara whakamaua me ngā kaupapa hei pīkau mā mātou, ngā māngai i pōtingia e koutou ki te Kaunihera o Tāmaki-Makaurau, i ngā toru tau kei mua i te aroaro. Ka pā atu ō mātou whakataunga me ā mātou mahi ki ngā tāngata o Albert-Eden, ngā hapori, ngā whenua me te āpōpō, ia rā, ia rā.

He mea whakaharahara ki a mātou kia mahi tahi mātou ko ngā hapori ki te tarae i te mahere - mai i te tīmatanga tonu. Nā whai anō, koia tā mātou i kōkiri ai. I whakawhitī kōrero ki te marea i mua i te tuhinga tuatahi. Mai i te Hakihea 2019 ki te Poutū-te-Rangi 2020, neke atu i te 840 tāngata i whakahoki kōrero mai mō ngā kaupapa e tino whakahirahira ana ki a rātou. I tūtaki mātou ki ētahi o koutou, i rongo kōrero mātou i ngā wharau hoko, ngā hui ā-rohe, ngā wānanga, mā runga pepa, mā runga puka ipurangi. I ngana mātou ki te wherawhera i ngā whakaaro o te katoa, heoi, i tino hiahia mātou kia whai wāhi atu te hunga e kore e tino rangona ana ki te whakatakoto whakaaro, ko te hunga rangatahi me ngā kāhui tangata o te tokoiti. I tino pai ki a mātou te rongo i ngā kōrero nō ngā waha o ngā tamariki; me whai hua te āpōpō o ngā tamariki rā i ō mātou whakataunga.

I whakamahia ngā kōrero i kohia ki te waihanga i te mahere, kātahi ka whakarewaina (ōkawa nei) hei kimi whakahokinga kōrero mai i te Hōngongoi ki te Hereturikōkā 2020. Nei rā te mihi ki ngā rōpū hapori huhua i whakatū hui kia taea e mātou te kohi whakaaro. Nā runga i ngā taumahatanga o te Mate-Korona, i whakatūria te wānanga ipurangi tuatahi tonu. Kei te mihi atu ki te hunga i whakahoki kōrero mai; kua whai wāhi atu ō whakaaro ki te mahere me ngā kaupapa matua mō tēnei rohe pōtae.

E ono ngā whāinga matua o te mahere, ā, kua whakairihia ētahi whakaaro whānui hei whakatutuki i ngā whāinga. E kore e tutuki katoa i ngā tau e toru, heoi, ko ngā panonitanga nui kei te mātāmua o ngā whakaaro i a tātou e anga whakamua ana. Kua āta whakaarohia me pēhea te whakataurite i te utu ki tētahi ringa me te whakatinana wawata ki tērā atu ringa, hei painga mō tō tātou hapori.

Ko te tino aronga ko te whakautu ki te 'panonitanga'. Ko tētahi o ngā akonga nui o te Mate-Korona - ko ētahi panonitanga he mea ohorere, heoi, kei te mārama mātou ki ngā kaupapa ka haere ake nei i tō tātou rohe pōtae i ngā tau tata kei mua i te aroaro: ka nui noa atu ngā whare e hangaia, ka piki haere te taupori, ka nui noa atu ngā iwi rerekē o te hapori, ka taumaha te taiao. Me aro hoki tātou ki ngā mahi o ia rā ki te whakangāwari i ngā taumahatanga ki te taiao - me mea kaupare i ngā raru o te ohotata āhuarangi e pā ana ki te katoa. He panonitanga nui e haere ake ana i ō tātou hapori. Waihoki, kei te pāngia tonutia ngā tāngata, ngā pakihī me te tāone i ngā raru o te Mate-Korona.

Kua tau te ara whakamua ki te whakangāwari i ngā taumahatanga o ēnei panonitanga. Ka tūwhera ngā ringaringa ki ngā kiritata hōu, ā, ka tautokona te hunga e raru ana ki te whiwhi i

ngā ratonga e tika ana. Ka whakarite i ngā papa tūmatanui me ngā pāka kia ea ai ngā wawata o te taupori e piki haere ana. Ka tiakina ngā taonga tuku iho, te taiao, ā, ka akiākina ngā kaupapa whakahihiko i te ohaoha ā-rohe. Ka nui noa atu ngā aratau hāereere ki te toro atu i ngā tōpitopito o te rohe.

Kua rongo mātou e hiahia ana e ētahi te whānuitanga o ngā kōrero mō ngā hinonga, ngā tahua pūtea me te wātaka. Kei ngā rārangī mahi ā-tau te roanga atu o ngā kōrero. Ka whakamārōhia te rārangī mahi ia Pipiri, ā, ka whiwhi te poari i ngā rīpoata mō te whakatinanatanga o ngā kaupapa ia toru marama. Waihoki, ka whakarāpopotohia ngā mahi kua pīkautia ki te rīpoata ia 18 marama. Ka whakairia hoki ngā kōrero ki ngā pūrongo pēnei i te whārangi Pukamata me te kawerongo ipurangi. Tēnā, whakapā mai mēnā e hiahia ana koe ki te whiwhi i tō mātou kawerongo.

Mā te nui o te pūtea e tū ai, e hinga ai rānei ētahi o ngā kaupapa i whakatakotohia. Ki te whakatinana i ēnei kaupapa, me whai pūtea mātou i te Mahere Pae-tawhiti o te Kaunihera - te mahere tahua pūtea mō Tāmaki-Makaurau mō ngā 10 tau kei mua i te aroaro.

Nō reira, mēnā e ngākaunui ana koe ki ngā pāka, ngā papa mārakerake, ngā taonga tuku iho, te hīkoi, te eke paihikara, te tākaro hākinakina, te noho ki te whare mātauranga, ngā kaupapa whakaora taiao, te whai pūtea ki te whakatinana i te kaupapa, te whai wāhi atu ki te hapori, ngā mahi tūao e whai hua nui ai te hapori - ko tēnei te mahere tika mōu.

E hīkaka ana te Poari ā-Rohe o Albert-Eden ki ngā mahi nunui ka pīkautia e tātou i ngā toru tau kei mua i te aroaro, he mahi whai hua nunui mō te rohe pōtae o Albert-Eden.

Ngā mihi nui,



**Margi Watson**

Heamana, Albert-Eden Local Board

## **He whakarāpopotohanga o ngā kaupapa matua o te mahere**

### **Whakaotinga tahi: Ngā hapori aumangea, honohono, kua whakamanatia e kaingākaunui ana i te kanorau**

E huri ana tō tātou hapori. Te whanaungatanga, te kotahitanga, te aumangea - he tino whakahirahira ēnei āhuatanga i tēnei wā. E hiahia ana mātou ki te whakanui i ngā rerekētanga o tēnā, o tēnā, ki te kimi hoki i te kura o roto i te panonitanga. E hiahia ana mātou ki te tautoko i ngā tāngata katoa kia whai wāhi atu ngā reo rerekē i ngā kaupapa manapori me ngā mahi whakamahere mō te āpōpō o tēnei rohe pōtae.

### **Whakaotinga rua: He takiwā kāinga ā-noho e whakaata ana, e uara ana hoki i tō tātou tuku ihotanga me te tuakiri ahurei, ināianei ki anamata**

E huri ana ō tātou takiwā kāinga. Te ū ki ō tātou taonga tuku iho, te whakanui i ngā tohu whenua ronganui me ngā takiwā kāinga - he tino whakahirahira ēnei āhuatanga i tēnei wā. Mā te whai māramatanga ki te nanahi e ū ai te tangata ki te tuakiri, mā te ū ki te tuakiri e taea ai e ia te kapo atu i ngā painga o te āpōpō i tēnei ao hurihuri.

### **Whakaotinga toru: He taiao kounga, ā, he āhuahanga noho toitū**

E huri ana te taiao. Te whakarauora i te taiao, te ū ki te ao waro iti, ngā mahi o ia rā e ngāwari ana ki te taiao - he tino whakahirahira ēnei āhuatanga i tēnei wā. Ka tautokona e mātou ngā tūao e whakaora ana i te taiao. Ka āwhina mātou i ngā kāinga, ngā kiritata, ngā pakihī me ngā hapori ki te whakatinana i ngā mahi e ngāwari ana ki te taiao.

### **Whakaotinga whā: He ōhanga ā-rohe kaha whai pokapū tāone taurikura**

He rāngai ohaoha i tō tātou rohe pōtae e taea ai ngā mahi nui te utu mō ngā tāngata whai pūkenga. He wāhi ki te whakatū i ngā wāhi mahi mō āpōpō i ngā rāngai ohaoha e tere whanake ana pēnei i ngā ratonga ringa ngaio, te whakaora tangata, te whakarite kai, te mātauranga. He whakahirahira ki ngā hapori ngā pakihī ririki ā-rohe me ngā pokapū tāone hei pū ohaoha, hei pū hapori hoki.

### **Whakaotinga rima: He papa rēhia, he ratonga hapori e hāngai ana ki te whānuitanga o ngā hiahia**

Ka whai wāhi atu ngā tāngata ki te whakapakari i te tinana, ki te tākarō ki waho, ki te whai hononga ki tangata kē, ki te ako hoki i ngā pāka me ngā whare kaunihera. Ka whakamaheretia te whakamahinga tino pai mō ngā pāka me ngā whare. Nā te whānui o ngā papa, ka whai wāhi atu hoki mō ngā kaupapa huhua.

## **Whakaotinga ono: He kōwhiringa mō te neke haere e haumaru ana, e ngāwari ana, e toitū ana**

E hiahia ana mātou kia whai kōwhiringa ngā tāngata ki te neke haere i tō tātou rohe pōtae. Ka tuku pūtea mātou ki ngā kaupapa e whakahaumaru ana i ngā ara, e huri ana i ngā wāhi kia ngāwari ake mō te hunga hīkoi, e akiaki ana i te hīkoi me te eke paihikara. Ka tū mātou hei māngai ki te akiaki i te pūnaha hāereere e māmā ana ki te pūkoro, e ngāwari ana te whakamahi, e ea ai ngā wawata rerekē.

## Whakarāpopotohangā o ngā take pūtea

Ngā whiwhinga pūtea, whakapaunga pūtea, whakapaunga pūtea haumi o te Poari ā-Rohe o Albert-Eden mai i te 1 Hōngongoi 2020 ki te 30 Pipiri 2021.

Rārangi Tahua Pūtea ā-Tau	2020/21 (\$000)
<b>Whiwhinga moni i ngā mahi whakahaere</b>	
Ratonga haporī ā-rohe	575
Whakarautaki ā-rohe me ngā mahi whakawhanake	-
Ratonga taiao ā-rohe	-
Mahi kāwana ā-rohe	-
<b>Tataunga whiwhinga moni i ngā mahi whakahaere</b>	
	<b>575</b>
<b>Whakapaunga moni ki ngā mahi whakahaere</b>	
Ratonga haporī ā-rohe	20,486
Whakarautaki ā-rohe me ngā mahi whakawhanake	619
Ratonga taiao ā-rohe	173
Mahi kāwana ā-rohe	1,202
<b>Tataunga whakapaunga moni ki ngā mahi whakahaere</b>	
	<b>22,480</b>
<b>More whakapaunga moni ki ngā mahi whakahaere</b>	
	<b>21,905</b>
<b>Whakapaunga pūtea tōpū</b>	
Ratonga haporī ā-rohe	2,113
Whakarautaki ā-rohe me ngā mahi whakawhanake	-
Ratonga taiao ā-rohe	-
Mahi kāwana ā-rohe	-
<b>Tataunga whakapaunga pūtea tōpū</b>	
	<b>2,113</b>

## **Ngā Mema o te Poari ā-Rohe o Albert-Eden**

	<b>Ngā taipitopito hei toro atu ki ngā mema</b>
	<b>Margi Watson – Heamana 25 Whiringa-ā-Rangi 2019 ki te 21 Haratua 2021</b> <b>Heamana Tuarua 22 Haratua 2021 - mutunga o te tau pōti 2019-2022</b> Waea kawe: 021 2878333 Waea: (09) 820-0288 <a href="mailto:Margi.Watson@aucklandcouncil.govt.nz">Margi.Watson@aucklandcouncil.govt.nz</a>
	<b>Lee Corrick – Heamana Tuarua 25 Whiringa-ā-rangi 2019 ki te 21 Haratua 2021</b> <b>Heamana 22 Haratua 2021 – mutunga o te tau pōti 2019-2022</b> Waea kawe: 021 2874488 <a href="mailto:Lee.Corrick@aucklandcouncil.govt.nz">Lee.Corrick@aucklandcouncil.govt.nz</a>
	<b>Graeme Easte</b> Waea kawe: 027 2097565 Waea: (09) 815-9000 <a href="mailto:Graeme.Easte@aucklandcouncil.govt.nz">Graeme.Easte@aucklandcouncil.govt.nz</a>
	<b>Rachel Langton</b> Waea kawe: 021 2811006 <a href="mailto:Rachel.Langton@aucklandcouncil.govt.mz">Rachel.Langton@aucklandcouncil.govt.mz</a>
	<b>Benjamin Lee</b> Waea kawe: 022 4236533 <a href="mailto:Benjamin.Lee@aucklandcouncil.govt.nz">Benjamin.Lee@aucklandcouncil.govt.nz</a>

	<b>Ngā taipitopito hei toro atu ki ngā mema</b>
	<b>Julia Maskill</b> Waea kawe: 021 1981063 <a href="mailto:Julia.Maskill@aucklandcouncil.govt.nz">Julia.Maskill@aucklandcouncil.govt.nz</a>
	<b>Christina Robertson</b> Waea kawe: 021 1940621 <a href="mailto:Christina.Robertson@aucklandcouncil.govt.nz">Christina.Robertson@aucklandcouncil.govt.nz</a>
	<b>Kendyl Smith</b> Waea kawe: 021 2888398 <a href="mailto:Kendyl.Smith@aucklandcouncil.govt.nz">Kendyl.Smith@aucklandcouncil.govt.nz</a>



---

© 2020 Auckland Council  
Auckland Council, Albert-Eden Local Board

ISSN 2253-1009 (Print)  
ISSN 2230-6633 (PDF)

Auckland Council disclaims any liability whatsoever in connection with any action taken  
in reliance of this document for any error, deficiency, flaw or omission contained in it.